

1886



Sammeld



Bl. 3<sup>r</sup>  
Z. 3624  
1721

1. Nic: Selnecker Verantwortung  
gegen die flaccianer. 1570
2. ejusdem, Verdicht von Weifen  
mann. Leipzig, 1580
3. ejusdem, ffo sind Regenten Spiegel.  
Erläuterung, 1600
4. ejusdem, ob ob eine waffe ffo Pözi  
dann ein junger mann ein alt  
adil nimt. 1590
5. ejusdem, Tüveln Verdicht.  
Leipzig 1595
6. ejusdem, Verdicht von J. Abend  
maß.  
Magdeburg, 1604.

5  
Eine Christliche Predigt/

**Des Ehrwürdigen /**

Achtbarn / vnd Hochgelahrten Herrn  
NICOLAI SELNECCERI, der hei-  
ligen Schrifft Doctoris / Weyland Pfar-  
herrn vnd Superattendenten  
zu Leipzig/ etc.

Darinnen die grosse gefehrligkeit Deud-  
scher Nation/ wegen des Türckens/ angezei-  
get/ vnd des Newe Jahr außgetheilet  
wird / etc.

Anno 1577. nach geschrieben/ vnd jetzt in  
Druck verfertigt /

Durch

M. Ehrhartum Bundmanum / zu Sel-  
ben vnd Etscheppen Pfarherrn.



In vorlegung Michael Stolln/ Buchhenders  
in Leipzig.

Im Jahr M. D. XCV.

**Dem Ehrenuesten / Wolge-  
achten vnd Fühnemen / Herrn Hein-  
rich Kottheupten dem Eltern / vnd Herrn Heinrich  
Kottheupten dem Jüngern / Bürgern vnd Händlern zu  
Leipzig etc. Meinen großgünstigen lieben  
Herren vnd geneigten  
Förderern.**

Gottes gnade/Geistliche vnd Leibliche wolfarth/beneben wünschung  
eines glückseligen Newen Jahrs zumor.

**W**errenueste/wolgeachte vnd Fühneme Herrn  
Kottheupte. Der weyse Mann Salomon sa-  
get in seinen Sprüchen am 17. cap. Non re-  
cedet malum de domo ingrati, Das vnglück  
vnd vbel soll vnd wird vom Hause dess vns  
danckbarn nicht weichen. So hat auch iener geleerte  
Neyde sich vernemen lassen/wenn man alle laster vnd  
Bubenstück mit einem einzigen worte geben wolle / so  
solle man einen vndanckbaren Menschen nennen. Weil  
es nu an deme/damit mir solches nicht auch begegnen  
vnd widerfaren möchte/der ich von E. E. als besondern  
liebhabern vnd beförderern des h. Ministerij, kurtz ver-  
ruckter zeit viel gut vnd wolthatten empfangen/welches  
der Allmechtige vnd Reiche Gott in ander wege reichlich  
vergeltten vnd erstatten wolle: Dabe ich/mein danck-  
bares gemüt/weil ich/wie auch S. Petrus bekennet/Golt  
vnd Silber nicht habe/mit dieser Newen Jahrs Pres-  
digt/des Weyland Ehrwürdigen/Achtbaren vñ Hoch-  
gelerten Herrn Nicolai Selnecceri, der heiligen schrift  
Doctoris, Pfarhern vnd Superintendentens zu Leipzig in  
Christo

Christo sällig ruhend / meines lieben Herrn præceptoris  
vnd gevatern etc. So er Anno 1577. im ersten Jahr  
seines Pfarampts daselbsten gethan/vnnd von mir / als  
dazumal seinem Discipel, aus desselben Mund auffgefän-  
gen/vñ so viel möglich vñ in eyl geschehen können/in der  
Kirchen nachgeschrieben/als bald aber vom Herrn Do-  
ctore, nu mehr seligen/recognosciret vnd vbersehen wor-  
den/etlichermassen auff ditzmal erklären / dieselbe / doch  
mit consens des Ehrwürdigen/Achtbarn vnd Wolge-  
terten Herrn M. Georgij Selnecceri, Pfarherrns vnd  
Superattendentis zu Delitzsch / meines lieben Herrn Ge-  
vatters/in druck verfertigt/ vnd E. E. hiermit zu einem  
glückseligen anfang/ zu einem glückseligern mittel/vnnd  
zum aller glückseligsten ausgang / dieses freudenreichen  
Newen Jahrs/vberschicken vnd verehren wollen. Der  
tröstlichen hoffnung vnnd gantzlichen zuuersicht/des sie  
E. E. wegen des Authoris, der bey derselben E. E. wie  
ich neulicher zeit vermercket / seiner getreuen dienst vnnd  
eyferigen auch trostreichen vnd trewhertzigen predigten  
halben/noch nicht vergessen/werde lieb vnnd angenehm  
sein/vñ desto williger mit solcher Newen Jars verehrung  
vorlieb nemen/vnd meine großgünstige geneigte Herrn  
vñ förderer/wie zuuor/also hinfuro sein vnd bleiben/die-  
selben/beneben dem gantzen handel vnnd gewerbe/dem  
lieben getrewen GOTT/mit Weib vnd Kindern/ zu Leib  
vnnd Seele/in seinen langwirigen gnadenschatz hier-  
mit befehlende. Gegeben zu Selben/am Newen Jahrs  
tage/dieses jetzt lauffenden 95.

E. E.

Dienstwilliger am wort Gottes

W. Ehrhartus Bundman/daselbsten  
vnd zu Tischeppen Pfarrer.

A ij

Enange.

# Euangelium am Newen Jahrtage/ Luce am 2. cap.

**U**nd da acht Tage umb waren/das das Kind beschnitten würde/da ward sein Name genennet **JESUS**. Welcher genennet war von dem Engel/ehe denn er in Mutterleibe empfangen ward.

## Auszlegung.

**L**iebten in **H**Ern **C**hristo/Wir sehen an in **C**hristlicher gemein/das **N**ewe **J**ar/Do wir gehen von der seligmachenden **G**eburt/vnsers **H**Ern vnd **H**eylands **JESUS** **C**hristi nu mehr 1577. **J**ahr. Von anfang der **S**chöpfung der **W**elt 5539. **U**nd befinden nu aus der **J**arzahl/das vnser **W**elt vnd **L**eben zum ende lauffet. Das wir nu darauff warten sollen/wann der **S**ohn **G**o**T**es/vnser **h**eyland **JESUS** **C**hristus mit dem **J**üngsten tage nu mehr zu ons her ein brechen wird vnd kommen/da denn nicht mehr ferne hin ist/vnd wir sind des gewies/das wir die letzten **H**äfen der welt sind / vnd warten auff die letzte zukunft vnd erlösung vnsers **H**Ern vnd **h**eylands vnd einigen sälligmachers **JESUS** **C**hristi.

**W**ir wollen aber zum eingang des **N**ewen jahrs kürlich von diesen **P**ünctlein handeln/als:

### Zum **E**rsten sagen.

**V**on der **Z**ahl/Dieweil wir jetzt von der welt **S**chöpfung  
her ges.

her zelen 5539. Wie lang dieselbige stehen/vnnd wie es Gott  
der Herr mit derselben will machen/vnnd zum Ende eylen wolle:  
Vnnd wie es auch komme/das etliche/wie zu sehen aus dem Euse-  
bio vber die 6000. Jahr mit ihren zelen sind kommen. Das  
ist gar nötig zu wissen/vnnd soll keiner nicht sein/der nicht sein son-  
derliches nachdencken hieruon haben solte.

### Zum Andern.

Wollen wir anhören: Wie wir vns in das Newe Jar  
ein jeder für seine Person schicken soll: Vnnd wie die Alten  
heute diesen tag sich durch sonderliche zeichen/ haben verehret/vñ  
vntereinander gewünschet die beschneidung des herzens/des erkent-  
nis vnnd vertrauen auff den Namen IESU Christi.

Von diesen beyden stücklein zu handeln/wolle GOTT sei-  
ne gnad vnd heiligen Geist geben/Amen.

### Zum Ersten.

**E** Wer Liebe haben offimals gehöret/vnd wird solchs offte in  
Kirchen vnd Schulen widerholet/es sollens auch offimals  
Vater vnd Mutter widerholen/mit ihren kindern vnnd ges-  
sinde/nemlich das GOTT der HERR innerhalb 6. tagen  
die ganze Welt erschaffen/vnnd den 7. tag geheiliget/daran ge-  
ruhet/den Sabbath geheiliget/ vnnd ein ruhetag darausgemacht.  
Nach dem fall nu der ersten eltern Adam vnnd Euae ist so ferne  
kommen/ vnnd ist durch GOTTes rath beschlossen worden/ das  
1000. Jahr für GOTT sollen sein wie ein tag/vnnd soll die  
Welt stehen 6. tage das ist 6000. Jahr. Darnach soll kommen  
der ewige Sabbath/Sabbathum Sabbathi, Sabbathū Sabba-  
thorum, vnd in alle ewigkeit bleiben ein heiliger Tag/der da ge-  
heiliget vnd gesegnet sein soll/an welchem GOTT alles in al-  
lem sein wird.

A. iii.

Weil

Weil wir nu solches wissen / vnd offimals solches gehört ha-  
ben vnd noch hören / vnd jekund zehlen 5539. von anfang der  
Schöpffung der Welt / so solten wir auch ein nachdencken haben /  
als Christen / nicht nachlässig sein / vñ gedencen / es wird immer dar  
sein vnd bleiben / wie es skunde ist / sondern wir solten wissen / das  
wir sind zum ende kommen / vnd lauffet alles zum ende / vnd ist noch  
eine kurze zeit verhanden / so lang die Welt stehen sol / wie sie jzt ist /  
vnd soll vnd kan solche zeit nicht erfüllet werden / wegen der bößheit  
vñ groben sündē der welt / Ja es würde auch kein außewelter sällig /  
sondern würden alle verfürret / wo die tage nicht solten verkürzet  
werden. Darumb weil solcher Termin vnd Jahrzal soll verkürzet  
werden / so lauffen wir nu / wie zuuor gesagt / zum ende der welt / vñ  
wissen / wir sind nahe zum jüngsten Tage / vñ gehet alles dahin / wie  
wir sehen vnd empfinden an vns / in vnserm herzen vñ gewissen / in  
gemeinem lauff vnd leben / das diese welt nu nicht mehr lang be-  
stehen kan / vnd stehen soll / das wissen wir / vnd also / das wir Gott  
dafür zu dancken haben / vñ schreien mit frölichem Herzen : Kom-  
me lieber HErr IESU Christe / komm wenn du wilt / wenn es dir  
gefellig ist / so komm / wir sind bereit / wir wollen dich empfangen mit  
vollem Arme vnd mit frölichen Armen vnd frölichen Herzen / vnd  
wollen dich küssen als vnsern einigen sälligmacher.

Es zehlen auch etliche heute vnter den geleerten 6575. von an-  
fang der Schöpffung der Welt / vnd zehlen nicht wie es sein soll  
als nemlich 5539. sondern sind bereit vber 6000. Jahr. Da  
ist nu die frage / wo dieser Irthumb herkomme / denn man sihet in  
den gedruckten schrifften / dz irer viel sind kommen vber dz 6000. Jahr.

Wir Deutschen sollen das wissen für andern / denn wir kommen  
her von Iaphet, der des Nohæ Sohn gewesen / der wider einen  
Sohn gehabt Ascenas, der wider einen Sohn gehabt Mannus,  
daher den diese deutsche wörter kommen Germannus vñ deutscher /  
das sind vnser Voreltern gewesen / Iaphet der in die hütten Sem  
kommen ist / das ist / der theilhaffig worden der rechten wahren Reli-  
gion /



ligion/ vnd der verheiffung des zukünfftigen Messia. Denn Sem  
ist der Hohepriester gewesen/ der dem Volck solches hat fürgetra-  
gen. Iaphet ist auch in die hütten kommen/ vnd der verheiffung  
theylhaffig worden.

Die ersten Vordtern der Deutschen Iaphet, Comar, Asce-  
nas vnd Mannus, daher die Cymbri kommen sind/ haben diesen  
brauch gehabt/ wenn sie eine Zahl gesetzt haben/ wie denn unsere  
Deutsche Zahl nach der zerstörung des Babylonischen gebedes  
oder Thurms die erste vnd also die elteste Zahl ist/ so oft die Zahl  
ist aus gewesen/ haben sie die 6. hinzu gesetzt/ vnd die theil der Zahl  
1. 2. 3. daraus kommen 6. Das haben sie allwege pflegen zu thun/  
damit zu bedeuten vnd anzuzeigen/ als das am 6. tage der Mensch  
erschaffen/ vnd in 6. tagen die Erschaffung geendet worden sey/  
vnd das am 6. tage/ das ist/ wenn die 6000. Jahr werden aus  
sein/ eine neue Welt sol kommen/ neue Himmel vnd Erden soll er-  
schaffen werden.

So haben sie sich auch durch diese zahl 1. 2. 3. erinnert/ des  
ewigen göttlichen wesens/ vnd durch die 1. Erste zahl haben sie  
verstanden/ das einige ewige göttliche wesen/ vnd in diesem einigen  
wesen die erste Person/ Gott den Vater. Durch die 2. zahl die an-  
dere Person/ in zweyen Naturen/ Gott den Sohn. Durch die 3.  
zahl die dritte Person/ Gott den heiligen Geist/ der außgehet vom  
Vater vnd Sohn. Diese heilige Dreyfaltigkeit hat in 6. tagen  
erschaffen Himmel vnd Erden/ vnd alles was drinnen ist/ vñ im 6.  
Sechsten alter hat 2. die ander Person sollen Mensch werden/ vnd  
gehet:

Das 1. Alter an von Adam bis auff Nohe.

Das 2. Von Nohe bis auff Abraham.

Das 3. Von Abraham bis auff Mosen.

Das 4. Von Mosen bis auff David.

Das 5. Von David bis auff Christum.

Das 6. Von der geburt Christi bis zum jüngsten Gerichte  
wenn

wenn nu das 6. Alter wird auch aus sein / vnd zu gleich die 6. Jahr werden ihr entschafft haben / darnach wird angehen dz 7. alter / der rechte Sabbath. Da Gott der Vater / Sohn vnd heiliger Geist wird alles in allem sein. Solches haben sie damit wollen anzeigen / vnd haben zu einem jeden was sie gezelet haben 1. 2. 3. 6. darzu gesetzt vnd gethan.

Du sind darzu kommen / erstlich die Chaldeer vnd Ægyptier vnd haben das Mysterium vnd geheimnis nicht verstanden / in solcher zahl / Daher ist kommen / das sie gezelet haben 1 2 3 6. Darumb wenn man hat gezelet die Jahr von der Welt anfang / haben sie diese zahl von den Voreltern 1. 2. 3. 6. auch darzu gethan. Warumb? Sie haben nicht verstanden das geheimnis. Wenn sie nu die zahl 1 2 3 6. zur vorigen / als wie wir ist von anfang der Welt zehlen / 5 5 3 9. gesetzt haben / so kompt die zahl heraus 6 7 7 5. Das sollen wir wissen / von wegen vnserer voreltern / was sie sich hieraus erinnert haben / vñ wie die Chaldeer sind darüber kommen / vnd solch geheimnis nicht verstanden / wie im Eusebio vnd Epiphanio vnd andern zu sehen.

Denn wenn man 1. 2. 3. 6. von den 6 7 7 5. hinweg thut / so kompt die rechte wahre zahl 5 5 3 9.

Das ist nu das erste / nemlich von der zahl / der Jugend zum besten / auch andern die ein nachdencken sollen haben.

### Zum Andern.

**U**ß volget dz ander / nemlich wie wir vns in das Neue Jahr schicken sollen. Wir fahen heute an / das Neue Jahr wie sollen wir vns / die wir Christen sein / recht darcin schicken? Erstlich sollen wir bedencken / vnd zu rück sehen / vnd wenn wir vns fürs ander zu rück gesehen haben / vnserer Herzen / Mund vnd Hand / zu Gott auffheben / vnd ime dancken / für seine grosse wolthat / für seinen schutz vnd schirm / vnd zum dritten / Weiter  
vmb

umb sehen/wie wir jetzt beyfamen sind/wie wir stehen / wie es vns  
gehet / vnd wie wir vntereinander Leben vnd Wandeln. Vnd  
zum vierdten/Gott bitten vmb verzeihung vnd vergebung der sün-  
den/vnd vmb hülffe vnd beystand Gott des heiligen Geistes. Zum  
fünfften/ auch vnter einander wüntschen/ ein glückseliges Neues  
Jahr/das es mir vnd dir/vnd vns allen/an Leibe vnd an Seel/  
wo nicht für der Welt/doch für Gott wolgehe. Zum sechsten/auch  
darvon sagen/warumb wir es vntereinander wüntschen sollen/  
vnd was die Alten/vnd sonderlich die Deutschen/für einen ge-  
brauch gehabt haben/Sich vnter einander zu grüssen/vnd vnter-  
einander glück zu wüntschen/von Gott dem HErrn/vñ wie sie zum  
beschluss haben gewünschet diese zwey ding: Beschneidung des  
Herzens/vnd erkentnis des lieben Jesulein.

Wenn wir nu zu rück auff's vergangene gedencen/ so müssen  
wir bekennē. Es ist Gottes gnad vñ barmherzigkeit/dz wir nicht  
alle lengst vergangen vnd gestorben vñ verdorben sind. Wer hette  
es gemeinet lieben Christen/das wir/die wir jetzt beyfamen sein/in  
so grosser gheiligkeit / (denn wñ wir für vnglück bißhero in weltli-  
chem Regiment/in Kirchen vñ Schulen/ im Hausregimēt gehabt/  
ist nicht noth zuerzehlen) diß Neue Jahr noch frisch vñ gesund er-  
leben würden. Den es ist vnser keiner/der ein wenig vernunfft hat/  
wenn er ihm nachdencket/der nicht darfür erschrecken solte. Vnd  
wo Gott ein wenig hat ruhe vnd friede gegeben/so ist's an deme/  
das wir müssen sagen/das es habe gehangen an einem Seidenen  
faden/vñ hengeret noch daran/es ist alles elend vnd schwach vnd so  
schwach/dz wir erschrecken/so offte wir daran gedencen. Denn was  
gefahr/kriegs vnd krießgeschrey halben haben wir aus gestanden/  
vnd wie es vnsern nachtbarn ergangen/wie viel irer haben müssen  
ir Blut vergiessen/wissen wir leider/wir erfahrens auch teglich/wie  
vnser Brüder vnd Schwester sind dar bey gewesen / habens ge-  
sehen/vnd könnens bezeugen. Nu müssen wir nicht anders ge-  
dencen/ denn also/dz wir sagen: Du getreuer Gott/wir sehen in  
B weß

wes Jammer vnd elend wir sind gestanden/wir sehen die fürnehm-  
sten heupter im weltlichen Regiment/in Kirchen vnd Schulen  
dahin gehen/vnd alles was vbrig/ist schwach vnd elend. Wir  
sehen jetzt auch/wie die bequemigkeit vñ gelegenheit dem Türcken  
sey gegeben/vns zu vberascheln vnd zu vberfallen/mit vns umbzu-  
gehen jämmerlich vñ gewulichen/als wir immermehr mit vnsern ge-  
dancken erreichen könnē/vñ ist im thor/thür vñ fenster auffgethan.

Item/wie wir in Kirchen vnd Schulen sind gestanden/das  
klagen wir dir lieber Gott / mit trawrigem hertzen / wie man mit  
Gottes wort/vnd mit seiner allmacht vnd warheit vmbgangen/  
wie dieselbige ist Extenuirt vnd verkleinert worden/vnd dersel-  
ben ihr ehre vnd Maicstet genömen/nemlich also/das/ ob sie gleich  
ist erhöhet worden / dennoch ihr nicht mehr zu geeignet worden/  
Denn so viel eine Creatur erleiden vnd ertragen kan. Vnd  
ist die Jugend in den Schulen/auffs gewulichste inficiret vnd ver-  
giftet worden. Solches erfahren wir mit schmerzen vnd traw-  
ren vnser Hertzens.

Item/wir sehen/wie die gelerten sind so boßhafftig vnterein-  
ander / mit zanken / beißen/ das wir sagen müssen / Ach du trewer  
Gott/wo weren wir hinkommen / was were vnser Lehre/ vnser  
Catechismus / was wer vnser HErr Christus / was wer vnser  
glaube an Christum gewesen / wenn du vns nicht hettest so lang er-  
halten/vnd widerumb auff rechten weg gebracht. So ferne ist es  
können/wir haben Christum wollen reformiren vñ Meistern/ha-  
ben ihn nicht wollen vber vnser vernunft sein lassen/vnd was wir  
mit vnser vernunft vñ Philosophia nicht haben erreichen könnē/  
dz hat nichts sein müssen / sondern er hat sich nach vnser vernunft  
ziehen vnd lencken müssen lassen/vnd solches were auch fortgegan-  
gen/wo Gott der HErr nicht hette ein Auge auff vnser kinder ge-  
habt/vnd gesehen/wo es hinaus wolt/vnd sonderliche Leut außge-  
richtet/die da anzeigen/ was dahinden gesteket / vnd leider dahin  
können/das wir die Religion für ein zweiffelhaftig ding gehalten.  
Da be

Da behütete vns Gott für. Darumb haben wir Gott zu dancken/  
das er vns noch väterlichen erhalten hat/ vnd dancken ihm also:  
Ach Herr/wenn du vns nicht hettest regiret/beschützet vñ erhalten/  
wo weren wir hinkommen? denn also ist mit vnser vernunfft ge-  
than / ehe wir sehen wo es hinaus will / so ist bereit vom Teuffel  
geschehen. Wenn wir sitzen schlummern vnd schlaffen/ so wachet  
der Teuffel/vnd bleset seine bößheit ins Weltliche Regiment/ sei-  
nen gifft in Kirchen vnd Schulen/ins Herz/ das wir nicht wisa-  
sen / was wir glauben / worauff wir leben oder sterben sollen. Da-  
rumb haben wir / sage ich / Gott hochzudancken/vnd weil wir noch  
sehen (wie wirs sehen) in was gefahr vnd noth wir stecken/ so  
sollen wir vns umbsehen/auff das in solchem umbsehen in vns er-  
hize das gebet zu Gott / das wir ime einen demütigen fußfall thun/  
vnd bitten/er wolle vns mit gnedigen augen ansehen/vnd vns  
von seinem angesicht nicht verstoßen.

Es ist freylich war/das vnser Vaterlandt jetzt also stehet/das  
wir sagen müssen/dz/weil Deutschland Deutschland gewesen ist/  
so ist nicht in so grosser gefahr gestandē als es jetzt stehet. Vnd ist  
dem Türcken/dem Erbfeinde der Christenheit/thor vñ thür auffge-  
than/vñ niemals so offen gewesen / als es jetzt/vñ ist den andern  
feinden niemal so zugesehen worden als jetzt / das wir sitzen in  
grosser gefahr/vnd haben warlich kein ander heupt noch zusucht/  
do wir mögen hinsitzen / denn zu dir Herr Christ alleine/der du  
bist ein Hirt vnd Bischoff vnser leibes vnd der Seelen. So  
haben wir auch bey vnd neben vns / vnd vnter vns solche sicher-  
heit/verachtung vnd vberdrus Gottes Worts/ Solche Gottes-  
lesterung vnd vppigkeit/ sichers Leben/in Vnzucht/Neid/Haß/  
Wucher/verforthellung des nechsten / das es vber alle massen ist /  
vnd schrecklich zu hören/welches auch ein Herz / so es anders ein  
Christlich Herz ist/mit grosser vngedult vnd schrecken hören müs-  
sen/dz wir sagen müssen/wenn wir vns umbsehen / dz des teuffels  
B ij grieff

grieff vnd Giffe/der Welt list vnd tücke / immer von tag zu tage  
vber alle massen wachsen/vnnd alle andere stend vnd Creaturen ne-  
men abe/vnd gehen von tage zu tage Berg ein. Wie thuen wir  
ihm denn? Wo sollen wir denn fliehen hin / vbi fugiam, wo sollen  
wir denn fliehen hin/da wir möden bleiben/zu dir HErr Christe als  
leine/das wird das beste sein. à Deo irato ad Deum placatum:  
Von dem Gott/der seinen Zorn sehen lest/zu dem Gott / der sich  
mit vns versonet. Es ist war. Esaias am 9. Was soll ich machen  
mit meinem volck/wenn ich gleich Predige / so fahren sie doch im-  
mer forth in ihren Sünden/wie thue ich ihm denn/wollen sie fort  
fahren/so will ich auch fort fahren/mein Zorn hat noch nicht abge-  
lassen. Mein hand ist noch außgestreckt / wie im Psalm stehet/Er  
hat giftige Pfeile außgelegt/kömpt er vnd drucket einmal ab/was  
wollen wir machen? Darumb sollen wir ihm einen demütigen  
Fussfall thun: Ach HErr halte inne / oder wiltu ja straffen / so  
straffe nicht nach deinem Zorn vnnd grim / sondern mache es mit  
gnaden vnd massen/Vre, tunde, seca, brenne/schlage / schneide/  
machs wie du wilt / schone nur vnser Seelen / vnnd verwirff  
vns nicht von dir. Das Gebet sollen wir thun/wollen wir an-  
ders das vns Gott soll gnedig sein.

Vntereinander sollen wir vns glück wünschen / nicht wie  
vnchristen/ die haß / neid vnnd zorn tragen/nein mit nichten nicht/  
auch nicht das einer begere den andern zuuerfortheilen/ sondern ein  
jeder der ein Christ sein will / soll auch mit herzen vnd freuden sei-  
nem Nechsten wünschen ein glückseliges freudenreiches Newes  
jahr/wie Esaias am 6. capittel / Christus der HErr selber Predi-  
get ein gnediges Jahr des HErrn / vnd wünschet vntereinander  
fried/freude vnnd alles guts / vnnd solches derowegen das wir be-  
zeugen / das wir vnserm nechsten gutes gönnen. Sintemal er  
auch mit dem Blut Jesu Christi / wie wir / ist abgewaschen / wenn  
wir solches thun/so halten wir ihn auch für ein mitgenossen. Denn  
wir haben einen Glauben/eine Tauffe/ein Sacrament / vnnd dar-  
mit.

mit bezeugen wir/das alles gutes / friede vnd freude vnd alle wol-  
farth an Leib vnd Seel/komme her von Gott/denn von vns kön-  
nen wir nichts haben. Zeigen auch an/das wir vnsern Nechsten  
erinnern/das er auch wolle Gott anruffen/vnd wie ich dir ein freu-  
denreiches Jahr wüdsche/so zeige ich an / das es von **G D E**  
komme/vnnd du Gott den **H E R R N** darumb anruffen vnnd bitten  
soltest. Desgleichen wie wir vns vntereinander ein glückseliges  
Newes Jahr wüdschen/ so zeigen wir an / das wir dem Teuffel  
troß bieten/wollen ihm absagen/vñ wollen vns von Gott dem heiz-  
ligen Geist /vnd durch die lieben Engelein als vnscere schuckherrn/  
regiren lassen. Wir sagen heute diesem tage abe dem Teuffel/  
der nicht lust hat zur freude/sondern zur trawrigkeit/vnnd derwegen  
bleibet in trawrigkeit/ vnnd ewigen verdammnis. Das sollen wir  
thun/vnnd vns zu Gott bekehren/ vnnd die fruchte des Glaubens  
vntereinander sehen vnd scheinen lassen.

Die alten Deutschen haben heute diesen tag vntereinander ihre  
Hieroglyphica, wie man es genennet / sonderliche figuren zum  
Newen Jahr gesendet vnd geschencket/darmit sie eines iudern ampt  
vnnd beruff haben anzeigen wollen:

Als den Predigern/ haben sie geschicket vnnd gegeben / das  
Läublein Noæ, das da kompt vnd bringet mit sich ein Delblat/da  
die Sündflut hatte auffgehöret. Damit haben sie wollen anzei-  
gen/das die Prediger sollen darauff sehen/wie sie durch die Predigt  
des heiligen Euangelij die armen betrüben/geängstigten vnd be-  
kümmerthen herzen vnd gewissen/trösten vnd auffrichten sollen/mit  
dem Geite/das ist/mit der Predigt des Euangelij/ das die Sünde  
vergeben sey durch den **H E R R N** Christum.

Den Zuhörern hat man gegeben ein Scheslein oder Läm-  
lein/das sie sich sollen erinnern/Sihe da/ich soll Christum Jesum  
hören /vnd ihm folgen/soll in Demut vnd Gedult leben/vnd hö-  
ren was mir mein Ershirt prediget / vnnd was er mir durch seine  
diener/das ist/durch die Pfarhern durch die Predigt des Gesetzes  
vnnd

Vnd Euangelijs sagen lesset/ dem sol ich glauben geben vnd folgen/  
vnd mich meinem Oberhirten gerne zu gefallen würgen vnd  
schlachten lassen.

Den Schulmeistern / Preceptorn vnd Rectorn/ sampt den  
Schülern/ hat man gegeben eine Kluckhenne/ mit ihren Jungen/  
das sie sollen die Jugend in Gottes Furcht auffziehen/ vnd wie  
eine Kluckhenne ihren Hünlein die Körnlein zuscharret/ Also sol-  
len die Schulmeister ihnen die Lehre fürlegen/ vnd die Schülerlein  
sollen als die Hünlein die Lehr fleissig auffklauben/ vnd miteinander  
gleich wie die lieben Engelein/ das liebe Kindlein zu Bethlehem vn-  
ser liebes Jesulein loben/ preisen/ ehren vnd anrufen.

Der Weltlichen Obrigkeit hat man gegeben einen Pellican/  
der seinen Schnabel setzet auff seine Brust/ vñ sauget Blut heraus/  
vnd machet also lebendig seine Junge/ damit anzuzeigen/ das ein  
Obrigkeit für sein Volck vnd Vnterthanen sorgen vnd strei-  
ten sol.

Principis est virtus maxima nosse Deum,

Principis est virtus proxima nosse suos.

Die erste Tugend eines Regenten ist/ das er Gott erkenne/ vnd  
die nechste andere Tugend ist / das er seine Vnterthanen erkenne  
vnd schütze.

Den Vnterthanen hat man gegeben ein Stock bienen/ Das  
gleich wie die Bienen sehen auff ihren Weisel oder König/ vnd  
denselben ehren/ Also sollen die Vnterthanen auch ihre Obrigkeit  
ehren/ vnd Christlichen vnd pflichtigen gehorsam leisten.

Denen die im Haußstand hat man geben die Halcyones, die  
Eysvogel/ die hecken jekund auff dem Meer/ vnd das wütende  
Meer ist d. 30. Tage stille/ von wegen dieser Vogel/ Also auch  
Vater vnd Mutter sind auch auff dem Meer/ denn sie haben gros-  
se Furcht/ Gefahr/ Sorg/ Mühe vnd Arbeit/ vnd leben dennoch  
in Ruhe/ Item/ man hat inen gegeben die Dmeisen/ das wie die-  
selben im Sommer fleissig sein/ vnd eintragen/ das sie den Win-  
ter her zu essen haben. Also auch die Eltern sollen nicht faule schlün-  
gel



gel sein/ sondern sollen achtung haben auff ihre Kinder/ ihnen das  
ihrige nicht verzehren/ vnd vmbbringen mit pancturen/ vnd vn-  
messigen schleimmen vnd Kleidungen.

Den Kindern hat man gegeben ein Storch/ welcher seine El-  
tern treget/ wenn sie alt werden. Daher auch der Storch seinen  
Namen hat/ von der natürlichen Liebe <sup>sopyi</sup> genendt/ so Vater vnd  
Mutter gegen iren Kindern tragen/ vnd die Kinder widerumb ge-  
gen den Eltern/ damit anzuzeigen/ das die Kinder ihre Eltern inn-  
ehren halten/ vnd wenn es von nöhten/ dieselben versorgen vnd  
ernehmen sollen.

Den Jungfrawen/ hat man gegeben ein Schneckenhaus/ da-  
mit anzuzeigen/ das sie sich sollen daheimen in ihren Heusern fein  
eingezogen halten/ vnd daheim bleiben/ wie die Schnecken ir Haus  
stets mit sich treget/ vnd sollen nicht hin vnd wider spaciern/ vnd  
alles ausgaffen/ sondern sich als keusche Jungfrawlein daheim hal-  
ten/ daran Gott vnd die Menschen ein wolgefallen tragen.

Dem Befind/ hat man gegeben einen Kranch/ damit anzuzei-  
gen/ dz gleich wie einer vnter ihnen die wach helt/ wenn die andern  
schlafen: Also auch das Befinde sol wachen vnd sehen/ das sie  
trewlich dienen/ mit irem wachen irem Herrn viel nutz schaffen.

Den armen Widwen hat man gegeben ein Tortekeublein/  
welches seines Ehegatten nicht vergisset/ damit anzuzeigen/ das  
sich eine Witwe sol fein eingezogen halten/ vnd in still ein gottse-  
liges Leben führen/ vnd mit dem Gebet bey Gott anhalten/ das er  
sie schützen wolle in aller gefahr.

In Gemein/ vnd sonderlich denen die noch in Sünden wider  
das gewissen fortfahren/ die ihr gewissen vberzeugen/ das sie Got-  
teslesterer vnd wucherer sein/ in haß/ neid/ zorn/ vnd vnzucht vnd  
verleumdung des nechsten leben/ gilt heute diese lehr/ von der Bes-  
schneidung. Darumb nemen dieselbigen heute diesen tag das 4.  
cap. Jeremiae zum Newen Jahr zu sich: Beschneidet die vor-  
haut ewers Herzen. Item/ das 4. cap. Esaiae, Lasset ab von ewren  
Sünden/ vnd nemet euch der Widwen vnd Waisen an/ vnd thu  
dem nech-

dem Nächsten guts / so will ich ewer Vater sein. Solches sollen alle die jenigen thun/die in Sünden leben/ vnd einen fürsatz haben Gott zu gefallen zu leben/vnd sich zu wider setzen/allen den jenigen/die wider Gott vnd sein wort sein / vnd nicht zugeben/das man Spöttisch von seinem wort/vnd von seinen Sacramenten rede.

Sonderlich weil jeziger zeit viel frembdes Volck im Marck vnd Gotteslesterer zu vns kommen / auch die Jüden jren zutritt zu vns machen/sollen wir desto fleißiger achtung auff vns selbst haben vnd geben/dz wir vns frembder sünden nicht theilhaftig machen. Denn nach dem Teuffel / seind keine grössere feinde des HERRN Christi/denn die Jüden. Der Türck ist wol auch ein arger Erbsfeind der Christenheit/nach dennoch ist er nicht so arg/als die vnstetigen Jüden/welche alle tage den HERRN Christum / die salige Jungfraw MARIA, vnd vns auffs aller ergste kessern vnd verspotten / vnd verfluchen. Vnd ob sie schon jren Procuratorn vnd Aduocaten, auch der Obrigkeit/die jnen geleit geben / ihre gebür vnd zum geschencke heute ein Neues Jahr geben/so geben sie es doch mit verbittertem Herzen/vñ wenn wir meinen/sie wünschden vns ein Neues freudenreiches Jahr / oder grüssen vns / so meinen sie doch in jhren Herzen auff ire sprach/ Schet will kom/etc. Der Teuffel hole dich.

Verflucht sind alle die/die nicht alle verfluchen/die den Herrn Christum hassen/vnd ihme feind sind / wie S. Paulus saget / I. Cor. 6. Wer den HERRN Christum nicht lieb hat/der sey verflucht vnd verdammet. Nun kan keiner Gott den Herrn lieben/der diese Gotteslesterer hauset vnd herberget/vnd mit jnen umbgehet vñ zu thun hat. Das sage ich darumb/das fromme Herzen sich erinnern/mit weme sie umbgehen/nemlich mit Teuffeln/die den Herrn Christum verspotten/vnd alles vbel gönnen. Lieber was geben sie vns/oder verkauffen sie vns/was sie vns zuvor nicht abgestolen haben. Das sey den vnbusfertigen fürklich zur erinnerung zum Newen Jahr gesagt.

Den

Den Busfertigen aber / den bekümmerten vnd erschlagenen  
Herzen / geben wir zum Newen Jahr / den Namen **JESU** /  
der sie trösten / stercken / auffrichten / vnd an Leib vnd Seel / selig  
machen soll.

Lob ehr vnd preis zu allerzeit /  
Sey dir heyland der Christenheit.  
Hilff das der Süsse Name dein /  
Im Tode erquick die Seele mein.

Darzu helffe vns allen / Gott der Vater / Gott der Sohn /  
vnd Gott der heilige Geist / hochgelobet in alle ewigkeit / Amen.

## Ein Gebet.

**A**lmechtiger / ewiger / gnediger / gütiger Barm-  
herziger **G D I E** / der du bist ein Vater vnsers **HERRN**  
vnd heylandes **JESU** Christi / wir Arme / Elende sün-  
der / kommen zu dir / mit traurigen bekümmerten Herzen / vnd er-  
kennen vnd bekennen dir vnser Sünde / darin wir sind empfangen  
vnd geboren / darin wir leider Leben / vnd vnser elendes leben zu-  
bringen. Vnd bitten dich / du wollest vns mit dem Blut deines  
Sohns solche Sünd / beydes die wir wissen / vnd nicht wissen /  
gnediglich / nur schlechts aus lauter gnade / reinigen vnd abwaschen /  
vnd vns also rein machen / das wir doch zu dir dörffen treten / vnd  
mit dir reden / vnd vns zu dir / als zu vnserm gnedigen Vater alles  
guts / alles trosts / aller gnaden vnd aller hülff verschen. Bitten  
dich derwegen / du getreuer **G D I E** vnd Vater / du wollest  
vns bey deinem wort / bey rechter lehr deines gesetzes / vnd heiligen  
Euangelij / vnd bey rechtem gesunden verstand vnd gebrauch / deiner  
hochwürdigen Sacrament / der heiligen Tauffe / vnd des heiligen  
E Abends

Abendmals gnediglich erhalten / vnd wollest vns heiligen in deiner  
warheit / dein wort ist die warheit / auff das dein Name vnter  
vns / von vns / in vns / vnd durch vns immerdar geheiligt werde /  
vnd dein Reich zu vns komme / auch hier in diesem leben / durch das  
wort das wir hören. Vnd das dein wille geschehe / wie im Himmel  
also auch auff Erden / vnd sonderlich bey deinem volck / deiner wer-  
den Christenheit. Wollest dem leidigen Teuffel / vñ allen Tyrans-  
nen vnd Ketzern wehren / alle offentliche vnd heimliche Practicken /  
samt iren anfangern / zu schanden machen / wie du bissher / auch in  
diesen Landen / Kirchen vñnd Schulen / gnediglich gethon hast /  
vnd ferner thun wirst / vnd wilt: Vnd weil wir sehen / wissen vnd  
erfahren / die macht vnd stärke / gewalt / Sebel vnd Dreyung des  
leidigen vñnd erschrecklichen Tyrannen des Türcken / wie er mit  
alten vñnd jungen / auch armen kindern in der wiegen / vñnd mit  
Weibspersonen / Frauen vnd Jungfrauen so erbermlich vmbge-  
het. So wollestu vns / Ach du trewer **G D T E** / für seiner Ty-  
ranney / gnediglich behütten / die woluerdiente Rutte vñnd Straff  
einziehen / vñ abwenden / vns durch deinen heiligen Geist / zur Bus  
vnd beferung bewegen / leiten vñnd führen. Ach **H E R R** beferet  
vns / so werden wir beferet.

Wollest auch vns vnter dem Schut vñnd Schirm / vñnd vnter  
der den flügeln vnser lieben Obrigkeit gnediglich erhalten in fried-  
ruhe / vnd heilsamer einigkeit / die da gehöret vñnd gerechet zu Lob  
vñnd Preiß deines Göttlichen namens / vnd zu vnser aller Seelen  
heyl vñnd sälligkeit / vñnd wollest vnser Obrigkeit / ja lang bey  
guter gesundheit vñnd langem Leben erhalten. Denn vns daran /  
sonderlich in jetzigem vbeln zustand / vnd in dieser grossen gefahr /  
das allerhöchste vnd gröste / das wir in diesem Leben haben / gelegen  
ist. Wollest auch deinen heiligen Geist / reichlich geben vnd mit-  
theilen / allen denen / die da vnser lieben Obrigkeit helffen treulich  
rathen / vñnd dienen zu allem dem / was zu deinem Lob vñnd Ehren  
gerechet /

gerichtet/ vnd zu heilsamen frid/ruhe vnd einigkeit gehöret/vnnd  
wollest vns also halten vnter deinem väterlichen schutz vnd schirm/  
du gereder Gott/dz wir dich recht erkennen/dir recht glauben/die  
recht gehorsam sein/dich recht anruffen/dir recht danken/dich recht  
fürchten/dir recht dienen / vnd vns für dir allzeit demütigen/ O du  
grosse hohe göttliche Matestet / wollest vns auch / die wir arme /  
schwache/etende/sündhaffuge würmlein sind/nicht in versuchung  
fallen lassen/sondern dem Teuffel / der Welt / vnnd vnserm eigen  
fleisch wehren/vnnd im standhafften Glauben/vnd warer Gottes  
fürcht gnediglich vnd festiglich erhalten/ vnd zu rechter zeit / wenn  
das Sterbstündlein herbey kömpt / vns erlösen von allem vbel/  
auff dz wir an vnserm ende/vnser arme seeligen auch in deine hende  
befehlen/vnnd bey dir vnnd deinem Sohn vnnd heiligen  
Geist/sein vnd bleiben/vnd dich loben vnd preis  
sen in alle ewigkeit/Amen/Amen/

H E X X I E S S I  
A M E N.



Gedruckt zu Leipzig/bey Zachariam Berwald/  
Im Jahr/ 1 5 9 5.


Faint, illegible text, likely bleed-through from the reverse side of the page.



Faint, illegible text at the bottom of the page, possibly bleed-through or a faint stamp.









AB 155 264

ULB Halle 3  
003 129 756




71A 7d


Hi-848

VD 17

~~120.~~  
/







5

Eine Christliche Predigt/  
**Des Ehrwürdigen /**  
Achtbarn / vnd Hochgelahrten Herrn  
NICOLAI SELNECCERI, der hei-  
ligen Schrifft Doctoris / Weyland Pfar-  
herrn vnd Superattendenten  
zu Leipzig/ etc.

Darinnen die grosse gefehrlichkeit Deud-  
scher Nation/ wegen des Türckens/ angezei-  
get/ vnd des Newe Jahr außgetheilet  
wird/ etc.

Anno 1577. nach geschrieben/ vnd jetzt in  
Druck verfertigt /

Durch

M. Ehrhartum Bundmanum / zu Sel-  
ben vnd Etscheppen Pfarherrn.



In vorlegung Michael Stolln/ Buchhendlers  
in Leipzig.

Im Jahr M. D. XCV.

